



# BILTEN

AGENCIJA ZA PREDŠKOLSKO OSNOVNO I SREDNJE OBRAZOVANJE

juli - septembar 2019. godine



AGENCIJA ZA PREDŠKOLSKO  
OSNOVNO I SREDNJE OBRAZOVANJE



Co-funded by the  
Erasmus+ Programme  
of the European Union



Dragi eTwinneri!

Nadamo se da ste se odmorili i uživali na raspustu i u čarima ovog sunčanog ljeta. Sigurni smo, nekima od vas raspust je bio prilika i za razmišljanje o prethodno realizovanim aktivnostima i ishodima postavljenih ciljeva. Ukoliko te ciljeve možda i niste dostigli, podsjećamo vas da nas očekuje još bolje, uzbudljivije i kreativnije eTwinnersko razdoblje u školskoj 2019/2020. godini.

Budite spremni za nova učenja i nove aktivnosti u kojima će vam, ponovo, kontinuiranu podršku pružati vaš eTwinning tim (DSP). Interne analize i statistički podaci iz godine u godinu potvrđuju naš napredak i ukazuju na moguće greške koje smo činili u prethodnom periodu. Stoga smo, s razlogom, ponosni kako se eTwinning mreža proširuje i u Bosni i Hercegovini na najbolji mogući način. Naš zajednički cilj je da eTwinning zaživi u praksi u što više odgojno-obrazovnih ustanova, da imamo što više kvalitetnih projekata koji će se implementirati u nastavnoj praksi, da se naši nastavnici profesionalno usavršavaju, umrežavaju i budu lideri u promociji eTwinninga. Također, cilj nam je da se taj nastavnički entuzijazam i eTwinning aktivnosti vrednuju te utiču na kvalitet nastavničke profesije i nastavničkog napredovanja s krajnjim ciljem kvalitetnog odgoja i obrazovanja za svu našu djecu.



Sve je prikazano na veoma objektivan način – s jasnim i čitljivim pokazateljima – i zbog toga smo i ove eTwinnerske godine veoma zadovoljni postignutim rezultatima. No to nije razlog da stanemo! Naprotiv, to nam je još veći podsticaj da krupnijim koracima idemo dalje i postignemo još bolje rezultate.

U ovoj godini nas očekuje još mnoštvo projekata, scenarija za vaše nastavne i vannastavne aktivnosti, još mnogo kontakt i online seminara i radionica, kao i naša velika Godišnja konferencija koja će se, već tradicionalno, održati u oktobru, mjesecu nastavničke profesije, kada ćemo slaviti petu godinu rada i postojanja i, uz to, nagraditi najbolje od najboljih eTwinnera u BiH.

Još jednom, želimo vam puno uspjeha u novoj eTwinnerskoj 2019/2020. godini uz parolu: Profesionalno jačajmo uz eTwinning!!!



Vaš eTwinning tim



## Državna oznaka kvaliteta

Sa zadovoljstvom vas obavještavamo da smo uspješno završili dodjelu za Državne oznake kvaliteta za školsku 2018/2019. godinu. Od ukupno 202 prijavljena projekta, prema svim uspostavljenim kriterijima, Državnom oznakom kvaliteta se okitilo 184 projekta. U ovoj godini se, ponovo, potvrdio napredak kvaliteta rada u eTwinningu preko aktuelnih projekata i angažmana naših eTwinnera. eTwinning Državna oznaka kvaliteta je svojevrsno priznanje eTwinnerima i odgojno-obrazovnim ustanovama za izuzetan nivo učestvovanja na eTwinning portalu.



Za nagrađene projekte, bh. eTwinneri su obaviješteni na eTwinning ličnim profilima i mogu preuzeti eTwinning plaketu kao dokaz njihovog kvalitetnog angažmana u projektu.

Svim nagrađenim eTwinnerima čestitamo s porukom da nastave još krupnijim koracima naprijed s krajnjim ciljem kvalitetnog odgoja i obrazovanja za svu našu djecu.

## Predstavljanje eTwinning aktivnosti na 11. regionalnoj konferenciji Inovativnih nastavnika i nastavnica/Step by Step



U Bijeljini je, u periodu od 22. do 25. augusta 2019. godine, održana 11. regionalna konferencija nastavnika i nastavnica **“Gradimo zajednicu – Moć ljudske povezanosti”** u organizaciji Centra za obrazovne inicijative Step by Step.

Preko 300 članova i članica Zajednice inovativnih nastavnika i nastavnica dokazalo je još jednom da je to mjesto na kojem se spajaju ljudi, rađaju ideje, kako bi stvarali dobar odgoj i obrazovanje i čuvali radost djetinjstva za SVAKO DIJETE!

Jedna od paralelnih sesija je bila i predstavljanje eTwinning projekta **„Famous female mathematicians 2“**. Ovu radionicu su vodile naše uspješne eTwinnerke – eTwinning ambasadorica Fatima Kličić i eTwinnerka Nada Sokolović, koja je ujedno i autorica projekta.

Ovim učešćem smo potvrdili da naši eTwinneri šire pozitivne i dobre primjere iz prakse. Agencija za predškolsko, osnovno i srednje obrazovanje, kao Državna služba za podršku eTwinningu, i u ovoj 2019/2020. školskoj godini pružat će nesebičnu podršku u ostvarivanju vaših prijedloga i ideja.

## Regionalna radionica za profesionalni razvoj (PDW) eTwinning ambasadora

### „Bratstvo i jedinstvo II/Bratstvo in enotnost II“

Bili smo domaćini druge Regionalne radionice za profesionalni razvoj (PDW) „Bratstvo i jedinstvo II/Bratstvo in enotnost II“ od 27. do 29. juna 2019. godine. Razmjena dobrih praksi i sticanje novog znanja bili su neki od ciljeva ove radionice na kojoj je učestvovao dvadeset jedan eTwinning ambasador iz Slovenije, Hrvatske, Srbije i Bosne i Hercegovine. Voditelji prezentacija i moderatori radionica bili su eTwinning ambasadori uz koordinaciju članova Državnih službi za podršku. Teme za rad, diskusiju i analizu bile su: demokratsko učestvovanje, web-alati i njihova upotreba u učionici, vođenje uspješnih eTwinning projekata, povezivanje eTwinning projekta sa Erasmus+ aktivnostima.



Održavanje regionalnih radionica poboljšava i unapređuje saradnju Državnih službi za podršku te se očekuje kontinuitet u njihovoj organizaciji.

## Rezultati izvještaja TALIS 2018: nastavnici i direktori škole kao cjeloživotni učenici

Izvještaj Organizacije za ekonomsku saradnju i razvoj (OECD) TALIS najveće je međunarodno istraživanje temeljeno na glasu nastavnika i direktora škole. U ovom prvom dijelu ciklusa iz 2018. istražuju se dimenzije profesionalizma u podučavanju.



Nažalost, Bosna i Hercegovina nije učestvovala u ovom istraživanju. Od zemalja iz regiona, u posljednjoj godini TALIS istraživanja, učestvovala je samo Crna Gora.

U izvještaju se opisuje kako nastavnici primjenjuju svoje znanje i vještine u učionici, uzimajući u obzir demografsku strukturu tih odjeljenja i školsku klimu. Također, procjenjuju se načini kako su nastavnici stekli znanje i vještine tokom obrazovanja i stručnog i profesionalnog osposobljavanja, kao i koje će korake poduzeti kako bi se razvili kroz kontinuirani profesionalni razvoj tokom svoje karijere.

**Objavila:** Organizacija za ekonomsku saradnju i razvoj (OECD)

[Preuzmite](#)

## Učinkovita roditeljska uključenost: priručnik za škole

Uticaj na učenje roditelja koji su aktivno uključeni u obrazovanje svog djeteta pokazao se kao jedan od najznačajnijih faktora na dobra učenička postignuća. Grupa United Learning izradila je Priručnik o roditeljskoj uključenosti kako bi se pomoglo školama da promovišu i aktueliziraju taj uticaj.

Priručnik sadrži pregled istraživačke literature ukazujući na elemente uspješne prakse u tom području, studije slučaja u kojima se navode primjeri u okviru Grupe, te niz praktičnih alata i informacija kako bi podržali roditelje u radu sa svojom djecom.



**Objavila:** Grupa United Learning

[Preuzmite](#)

## Planovi za učenje temeljeno na projektu s eTwinningom



Niz planova za učenje temeljeno na projektu s ciljem podsticanja saradnje između odgojno-obrazovnih ustanova, posebno na platformi eTwinning. Planove su izradili učesnici kursa [Otvoreni eTwinning: Učenje temeljeno na projektu i zajednica za škole u Evropi](#) na Teacher Academy.

[Otvoreni eTwinning: Učenje temeljeno na projektu i zajednica za škole u Evropi](#) internetski je kurs koji se provodio 2018. na Teacher Academy te je i dalje dostupan za pregledavanje. Kao dio kursa, učesnici su izradili gotove planove koji bi im omogućili da započnu kvalitetan projekt, uključujući neke ideje, alate i aktivnosti obuhvaćene kursom.

[Projektним planovima može se ovdje pristupiti](#) i dostupni su na engleskom jeziku.

Veliko hvala svim autorima projektnih planova!

**Objavila:** School Education Gateway Teacher Academy

[Preuzmite](#)

Dijeljenje je osnovni ključ svakog uspjeha!

Pablo Picasso

